



REPUBLIKA E SHQIPËRISË

KUVENDI

PROJEKTLIGJ

Nr. ____/2022

“PËR DISA SHTESA DHE NDRYSHIME NË LIGJIN NR. 9121, DATË 28.07.2003 “PËR MBROJTJEN E KONKURENCËS””

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË

V E N D O S I:

Në ligjin nr. 9121, datë 28.07.2003 “Për mbrojtjen e konkurrencës”, bëhen këto shtesa dhe ndryshime:

Neni 1

Neni 1 ndryshohet, si më poshtë vijon:

“Neni 1

Qëllimi i ligjit

Qëllimi i këtij ligji është përcaktimi i rregullave të posaçme të sjelljes së ndërmarrjeve private e publike që kryejnë veprimtari ekonomike, për garantimin e konkurrencës së lirë e efektive dhe

nxitjen e efijencave ekonomike në tregun e brendshëm si dhe përcaktimin e kompetencave dhe përgjegjësive të institucionit përgjegjës të ngarkuar për zbatimin e këtij ligji.

Neni 2

Në nenin 3, pas pikës 9 shtohen pikat 10, 11 dhe 12, me këtë përmbajtje:

“10. “Praktikë e bashkërenduar” është koordinimi ndërmjet ndërmarrjeve të cilat, pa arritur në fazën e lidhjes së një marrëveshjeje formale, bashkëpunojnë me vetëdije në praktikë duke kufizuar, deformuar ose shtrembëruar konkurrencën në treg. Një praktikë e bashkërenduar mund të krijohet nga komunikimi i drejtpërdrejtë ose i tërthortë midis ndërmarrjeve, qëllimi ose pasoja i të cilit është të ndikojë në sjelljen e tregut ose të zbulojë sjelljen e synuar në të ardhmen për konkurrentët.

11. “Marrëveshje në oferta” është ajo marrëveshje ku ndërmarrjet gjatë procedurave të prokurimit publik, nuk konkurrojnë midis tyre por bien dakord fshehurazi për të caktuar çmimet ose për të ulur cilësinë e mallrave, punëve ose shërbimeve për blerësit që dëshirojnë të prokurojnë produkte, shërbime ose punë nëpërmjet një procedure prokurimi apo kur bien dakord të koordinojnë ofertat e tyre në prokurimet publike në një nga format e mëposhtme:

i) ofertë e mbuluar:

- kur konkurrentët pranojnë të paraqesin ofertë më të lartë sesa oferta e fituesit të përcaktuar:

- njëri nga konkurrentët pranon të ofertojë me një shumë e cila është shumë e madhe për t’u pranuar si ofertë.

- njëri nga konkurrentët paraqet një ofertë e cila përmban terma specifike të cilat janë të paparanueshme nga Autoriteti Kontraktor.

ii) ofertë e përmbajtur, është ajo ofertë ku konkurrentët bien dakord që të mos ofertojnë apo të tërhiqen nga një ofertë e paraqitur në mënyrë që oferta e përcaktuar fituese në marrëveshje të pranohet si e tillë;

iii) ofertë në rotacion, është ajo ofertë kur konkurrentët merren vesh të ofertojnë, duke rënë dakord paraprakisht që fituesi të jetë njëri prej tyre sipas një rradhe të caktuar;

iv) ndarje e tregut, fenomen i cili ndodh kur konkurrentët ndajnë në pjesë tregun dhe bien dakord që të mos konkurrojnë për një pjesë të caktuar konsumatorësh, ose një pjesë të caktuar gjeografike.”

“12. “Sekret tregtar” është informacioni që përmbush kërkesat e mëposhtme:

- a) është sekret në kuptimin që në tërësinë e tij ose për sa i përket konfigurimit të saktë dhe kombinimit të pjesëve përbërëse të tij, nuk është gjerësisht i njohur ose lehtësisht i aksesueshëm për personat që përgjithësisht merren me llojin e informacionit në fjalë;
- b) ka vlerë tregtare, sepse, përsa kohë nuk njihet nga të tjerët, i siguron ndërmarrjes një avantazh konkurrencial
- c) u është nënshtruar hapave të arsyeshëm për ruajtjen e informacionit, sipas rrethanave, nga personi që zotëron në mënyrë të ligjshme informacionin për të mbajtur sekretin të fshehtë.

Neni 3

Në nenin 4, bëhen shtesa dhe ndryshime, si më poshtë vijon:

- a) Në pikën 1, pas germës “d”, shtohet germa “dh”, me këtë përmbajtje:
“dh) përbëjnë një nga format e marrëveshjes në oferta, në procedurat e prokurimit publik sipas nenit 3, pika 11 të ligjit”.
- b) Në pikën 2 referencat “neneve 5, 6 dhe 7” zëvendësohen me referencat “neneve 5 dhe 7”.

Neni 4

Pas nenit 4, shtohet neni 4/1, me këtë përmbajtje:

“Neni 4/1

Ftesë për marrëveshje të ndaluar

1. Është e ndaluar për një ndërmarrje të propozojë, të detyrojë, të motivojë ose në çfarëdo mënyrë të ftojë një ndërmarrje tjetër për të marrë pjesë në një marrëveshje midis ndërmarrjeve ose në vendimet e grupimeve të ndërmarrjeve ose në praktika të bashkërenduara që synojnë pengimin, kufizimin ose shtrembërimin e konkurrencës, siç parashikohen në nenit 4 të ligjit.
2. Praktikrat sipas pikës 1 të këtij neni, nuk ndalohen kur plotësojnë kushtet e nenit 5 të këtij ligji.”.

Neni 5

Në nenin 5, bëhen shtesa dhe ndryshime, si më poshtë vijon:

1. Paragrafi i parë hyrës numërohet pika 1 dhe pas fjalëve “çdo marrëveshje” shtohen fjalët “apo kategori marrëveshjesh, të cilat kontribuojnë”.
2. Pikat 1 dhe 2, bëhen respektivisht gërmat “a” dhe “b”.
3. Pas pikës 1, shtohet pika 2, me këtë përmbajtje:

“2. Komisioni miraton rregullore për kategoritë e marrëveshjeve që përjashtohen nga ndalimi i parashikuar në pikën 1 të nenit 4. Në këto rregullore përcaktohen me hollësi kushtet që duhet të përmbushin marrëveshjet, për të përfituar nga përjashtimi i ndalimit të parashikuar në pikën 1 të nenit 4.”

Neni 6

Neni 6 shfuqizohet.

Neni 7

Në nenin 10, në pikën 1, pas germës “c”, shtohet germa “ç”, me këtë përmbajtje:

“ç) krijimit të një ndërmarrje të përbashkët (joint venture) nga dy ose më shumë ndërmarrje të pavarura, e cila funksionon mbi baza të përhershme si një ndërmarrje e pavarur ekonomike.”.

Neni 8

Në nenin 12, bëhen shtesa dhe ndryshime, si më poshtë vijon:

1. Në pikën 2, fjalët “me karakteristikat e parashikuara në pikën 3 të nenit 10 të këtij ligji” hiqen.
2. Pas pikës 3, shtohet pika 4, me këtë përmbajtje:

“4. Autoriteti i Konkurrencës vlerëson kryesisht përqendrimet e të gjitha ndërmarrjeve të cilat, brenda një periudhe dy vjeçare nga momenti i lidhjes së marrëveshjes për bashkim, përftim kontrolli apo krijimin e një ndërmarrjeje të përbashkët, plotësojnë kriterin e kufirit të xhiros, megjithëse në momentin e lidhjes së marrëveshjes nuk përmbushnin kriteret për njoftim sipas këtij ligji.”

Neni 9

Në nenin 19, në fund të fjalisë së parë shtohen fjalët “nga të cilët të paktën dy të jenë të profilit juridik dhe dy të profilit ekonomik”.

Neni 10

Në nenin 20, gërmat “b” dhe “c” ndryshohen me këtë përmbajtje:

“b) të ketë vjetërsi pune jo më pak se 15 vjet, të jetë dalluar profesionalisht dhe të ketë integritet të lartë moral në profesionin e juristit apo të ekonomistit.”

“c) të ketë jo më pak se 5 vite eksperiencë pune pranë një institucioni të arsimit të lartë universitar ose të mbajë gradën shkencore Doktor i Shkencave në fushën e drejtësisë apo ekonomisë;”

Neni 11

Neni 21 ndryshohet, si më poshtë vijon:

“Neni 21

Zgjedhja e anëtarëve të Komisionit

1. Anëtarët e Komisionit zgjidhen me shumicë votash, në prani të më shumë se gjysmës së të gjithë anëtarëve të Kuvendit të Republikës së Shqipërisë me kandidatura alternative si më poshtë:
 - a) një anëtar propozohet nga Presidenti i Republikës;
 - b) dy anëtarë propozohen nga Kuvendi i Shqipërisë;
 - c) dy anëtarë propozohen nga Këshilli i Ministrave.
2. Anëtarët e Komisionit zgjidhen për një periudhë 5 vjeçare, me të drejtë rizgjedhje vetëm 1 herë.
3. Kuvendi, zgjedh Kryetarin e Komisionit, ndërmjet anëtarëve jurist, mandati i të cilit zgjat deri në përfundim të mandatit si anëtar. Zëvendëskryetari zgjidhet nga anëtarët e Komisionit.
4. Tre muaj para përfundimit të mandatit të çdo anëtari komisioni, Autoriteti njofton me shkrim Kuvendin, i cili fillon praktikën për zgjedhjen e anëtarit të ri. Në rastet kur mandati i anëtarit të

komisionit ka përfunduar dhe nuk është realizuar emërimi i anëtarit të ri, anëtari i vjetër qëndron në detyrë deri në zëvendësimin e tij.”.

Neni 12

Neni 23, bëhen këto ndryshime:

a) Pas pikës 1, shtohet pika 2, me këtë përmbajtje:

“2. Rastet e gjendjes në konflikt interesi të Anëtarëve të Komisionit dhe punonjësve të Autoritetit të cilët janë përfshirë në zhvillimin e procedurës deri në miratimin e vendimit të Komisionit, parashikohen dhe trajtohen në përputhje me legjisllacionin në fuqi për parandalimin e konfliktit të interesave.”.

Neni 13

Neni 30, riformulohet si më poshtë vijon:

“Neni 30

Ruajtja e konfidencialitetit dhe e sekreteve tregtare

1. Anëtarët e Komisionit dhe të gjithë punonjësit e Autoritetit ose personat e tjerë të autorizuar nga Komisioni për zbatimin e këtij ligji, ruajnë sekretin profesional dhe nuk u japin të dhëna konfidenciale, të siguruara gjatë kryerjes së detyrave të tyre, asnjë personi ose institucioni, me përjashtim të rasteve kur gjykata me vendim përfundimtar të formës së prerë vendos se Autoriteti mund të ekspozojë kategoritë e mëposhtme të provave:

- a) informacionin e përpiluar nga një person fizik ose juridik posaçërisht për procedimet përpara Autoritetit të Konkurrencës,
- b) informacionin që Autoriteti ka hartuar dhe iu ka transmetuar palëve gjatë hetimeve të tij,
- c) marrëveshjet apo deklaratat nga të cilat palët janë tërhequr.

2. Provat e gjendura në dosjet e Autoritetit të Konkurrencës do të ekspozohen vetëm me vendim përfundimtar të formës së prerë të një gjykate dhe vetëm në ato raste kur këto prova nuk merren pranë një institucioni tjetër publik ose një pale tjetër të tretë me përpjekje të arsyeshme. Dokumentet e brendshme të Autoritetit të Konkurrencës, korrespondenca me autoritetet e tjera të konkurrencës dhe ndërmjet autoritetit të konkurrencës dhe autoriteteve të zbatimit të ligjit si dhe

kërkesat e marrëveshjet për lehtësimin nga gjobat nuk do të zbulohen në asnjë moment. Kjo vlen dhe pas mbarimit të detyrës.

3. Publikimet e Autoritetit nuk duhet të përmbajnë të dhëna që përbëjnë sekret tregtar.

4. Sekreti tregtar në kuptim të këtij neni është:

- a) gjithçka që përcaktohet si sekret tregtar sipas përkufizimit të nenit 2, pika 12 të këtij ligji
- b) gjithçka që është përcaktuar si sekret tregtar nga ndërmarrja nëse pranohet si i tillë nga Autoriteti në kuptim të këtij ligji.

5. Autoriteti merr parasysh kriteret e mëposhtme, por jo vetëm, për të përcaktuar nëse informacioni mund të përbëjë sekret tregtar:

- a) masën në të cilën informacioni është i njohur jashtë ndërmarrjes;
- b) masën në të cilën janë marrë masa për mbrojtjen e informacionit brenda ndërmarrjes;
- c) vlerën e informacionit për ndërmarrjen dhe konkurrentët e saj.

6. Nuk konsiderohet sekret tregtar:

- a) informacioni që është i disponueshëm publikisht, përfshirë informacionin e disponueshëm nëpërmjet shërbimeve të specializuara të informacionit ose që është i njohur nga specialistët e fushës;
- b) informacioni historik, në veçanti informacioni i cili ka jetëgjatësi të paktën 5 vjet, pavarësisht nëse është konsideruar si sekret tregtar, sipas përcaktimeve të akteve nënligjore të Komisionit të Konkurrencës mbi konfidencialitetin dhe aksesin në dosje.
- c) informacion vjetor dhe statistikor. Xhiro vjetore normalisht nuk konsiderohet si sekret tregtar, pasi është një shifër e publikuar në llogaritë vjetore ose e njohur ndryshe në treg;
- d) të dhënat dhe dokumentacioni mbi të cilin bazohet vendimi i Autoritetit.

7. Me përjashtim të gërmës “a” dhe “b” të pikës 4 të këtij neni, kur ndërmarrja i dorëzon Autoritetit dokumentacion i cili ka në përbërje të tij të dhëna konfidenciale dhe nuk ofron versionin jo konfidencial të dokumentacionit përkatës apo të të dhënave që nuk përmbajnë informacion konfidencial ose sekret tregtar, Autoriteti, pasi t'i ketë dërguar një shkresë ndërmarrjes në fjalë, përfundimisht do të supozojë se një dokumentacion i tillë nuk përmban të dhëna lidhur me sekretin tregtar.”.

Neni 14

Në nenin 31, bëhen shtesa dhe ndryshime, si më poshtë vijon:

1. Pika 2 ndryshohet, si në vijim:

“2. Të ardhurat nga gjobat, që krijohen në zbatim të këtij ligji, derdhen në Buxhetin e Shtetit dhe përdoren sipas akteve ligjore në fuqi.”

2. Pas pikës 2, shtohet pika 3, me këtë përmbajtje:

“3. Të ardhurat që krijohen nga procedurat e kontrollit të përqendrimeve, tarifat administrative për kontrollin e përqendrimeve dhe autorizimet e përqendrimeve, sipas përcaktimeve të neneve 10, 12, 56, 57, 60 dhe 61 të këtij ligji, si dhe të ardhurat që krijohen nga procedurat e përjashtimit nga ndalimi të marrëveshjeve sipas përcaktimeve të neneve 5, 7, 48 dhe 50 të këtij ligji, derdhen në llogarinë e Autoritetit. Këto të ardhura do të përdoren për qëllime investimi dhe shpenzime operative, të cilat kontribuojnë në përmbushjen e misionit të institucionit, sipas rregullave dhe procedurave të përcaktuara me udhëzim të përbashkët të Ministrit të Financave dhe Kryetarit të Autoritetit të Konkurrencës”.

Neni 15

Në nenin 34, në fund të fjalisë, shtohet togfjalëshi “brenda afateve të kërkuara nga Autoriteti.”.

Neni 16

Në nenin 35, bëhen shtesa dhe ndryshime, si më poshtë vijon:

1. Në pikën 1, në fillim të fjalisë fjala “Sekretariati” zëvendësohem me fjalët “Inspektorët e Autoritetit” dhe pas fjalëve “të parashikuara në këtë ligj” shtohen fjalët “dhe aktet nënligjore në zbatim të tij.”.

2. Në pikën 2, fjalët “inspektorët e Sekretariatit” zëvendësohet me fjalët “inspektorët e Autoritetit”.

3. Pas pikës 3, shtohet pika 4, me këtë përmbajtje:

“4. Autoriteti mund të kërkojë ndihmën e inspektorëve të organeve tatimore gjatë kryerjes së inspektimeve.”.

Neni 17

Në nenin 36, fjalët “Inspektorët e Sekretariatit” zëvendësohen me fjalët “Inspektorët e Autoritetit”.

Neni 18

Në nenin 37, bëhen ndryshimet e mëposhtme:

- a) Në pikën 2, fjalët “Inspektorët e Sekretariatit” zëvendësohet me fjalët “Inspektorët e Autoritetit”.
- b) Pas pikës 2, shtohet pika 3, me këtë përmbajtje:

“3. Kur gjatë kryerjes së inspektimeve, konstatohen ose ka dyshime për ekzistencën e elementëve që mund të përbëjnë kundravajtje administrative ose vepër penale, Autoriteti referon rastin pranë organeve kompetente.”

Neni 19

Në nenin 40, bëhen ndryshimet e mëposhtme:

- a) Pika 1 ndryshohet, me këtë përmbajtje:

“1. Kundër vendimeve të Autoritetit mund të bëhet ankim në Gjykatën Administrative të Shkallës së Parë Tiranë brenda 45 ditëve nga e nesërmja e njoftimi i vendimit, me përjashtim të rastit të parashikuar në nenin 42, pika 4 të këtij ligji.”

Neni 20

Në nenin 41, bëhen ndryshimet, si më poshtë vijon:

1. Vendoset titulli i nenit “Hetimi i përgjithshëm”.
2. Pas pikës 1, shtohet pika 2, me këtë përmbajtje:

“2. Autoriteti, ka akses në bazën e të dhënave sipas marrëveshjeve përkatëse me institucionet e mëposhtme:

- a) Drejtorisë së Përgjithshme të Tatimeve;
- b) Drejtorisë së Përgjithshme të Doganave;
- c) Qendrës Kombëtare të Biznesit;

d) Agjencisë së Prokurimit Publik.”.

3. Ndryshon numeracioni i pikës në vijim respektivisht në 2/1.
4. Në pikën 2 ekzistuese, fjalët “për pikën 2” zëvendësohen me fjalët “për pikën 2/1”.

Neni 21

Në nenin 42, bëhen ndryshimet, si më poshtë vijon:

1. Në pikën 3, fjalët “mbetjen anonim” zëvendësohen me fjalën “anonimitetin”.
2. Pas pikës 3, shtohet pika 4, me këtë përmbajtje:

“4. Kundër vendimit të Komisionit për fillimin e hetimit paraprak, nuk mund të bëhet ankim në gjykatë.”.

Neni 22

Në nenin 43, pika 1, fjalët “sekretariati i komisionit” zëvendësohet me fjalët “Sekretariati i Autoritetit”.

Neni 23

Neni 46 ndryshohet, bëhen ndryshimet si më poshtë vijon:

1. Titulli i nenit bëhet “Anulimi dhe shfuqizimi vendimeve”
2. Fjalët “të revokojë ose të ndryshojë” zëvendësohen me fjalët “të anulojë apo shfuqizojë”.

Neni 24

Në nenin 48, fjalët “nenet 5, 6 dhe 7” zëvendësohen me fjalët “nenet 5 dhe 7”.

Neni 25

Në nenin 49, pika 4, shfuqizohet.

Neni 26

Në nenin 50, bëhen ndryshimet, si më poshtë vijon:

1. Titulli i nenit bëhet “Vendimi për përjashtim nga marrëveshja”
2. Pika 5 shfuqizohet.

Neni 27

Në nenin 51, bëhen ndryshimet, si më poshtë vijon:

1. Titulli i nenit bëhet “Anulimi dhe shfuqizimi i përjashtimit “.
2. Në pikën 1, fjalët “të revokojë” zëvendësohen me fjalët “të anulojë, shfuqizojë”.
3. Në pikën 2, fjalët “të revokohet me efekt prapaveprues” zëvendësohen me fjalët “të anulohet”.

Neni 28

Në nenin 52, pika 2, fjalët “të neneve 5 dhe 6” zëvendësohet me fjalët “të nenit 5”.

Neni 29

Neni 53, pika 1, gërma “c” ndryshohet, si më poshtë vijon:

“c) ndërmarrjet që kanë kontrollin e ndërmarrjes së përbashkët.”.

Neni 30

Neni 56 riformulohet, si më poshtë vijon:

“Neni 56

Procedura paraprake

1. Në rast se përqendrimi nuk shfaq shenja të kufizimit në mënyrë të ndjeshme të konkurrencës në treg ose në një pjesë të tij, në veçanti, si rezultat i krijimit ose forcimit të pozitës dominuese, komisioni vendos të autorizojë përqendrimin brenda 2 muajve nga data e marrjes së njoftimit.
2. Nëse konstatohet se përqendrimi shfaq shenja të kufizimit në mënyrë të ndjeshme të konkurrencës në treg ose në një pjesë të tij, Komisioni vendos:
 - a) autorizimin e përqendrimit me kushte dhe detyrime;
 - b) fillimin e procedurës së thelluar.
3. Në rastin e autorizimit me kushte dhe detyrime në procedurën paraprake, afati i përcaktuar në pikën 1 të këtij neni shtyhet me dy javë, nëse ndërmarrjet pjesëmarrëse angazhohen të marrin masa për eliminimin e kufizimit në mënyrë të ndjeshme të konkurrencës në treg ose në një pjesë të tij, në veçanti, si rezultat i shenjave të krijimit ose të forcimit të pozitës dominuese. Angazhimet e propozuara nga palët paraqiten pranë Autoritetit jo më vonë se një muaj nga data e marrjes së njoftimit.
4. Mungesa e komunikimit brenda këtyre afateve konsiderohet si vendim, që autorizon përqendrimin dhe mund të realizohet pa rezerva.”.

Neni 31

Në nenin 63, bëhen ndryshimet, si më poshtë vijon:

1. Titulli i nenit bëhet “Anulimi dhe shfuqizimi i vendimit “
2. Në paragrafin hyrës fjalët “ta revokojë” zëvendësohen me fjalët “ta anulojë apo shfuqizojë”.

Neni 32

Në nenin 73, bëhen ndryshimet si më poshtë vijon:

a) Në pikën 1, pas germës “dh”, shtohet germa “e”, me këtë përmbajtje:
“e) bëjnë ftesë për pjesëmarrje në marrëveshje të ndaluar, sipas nenit 4/1 të këtij ligji.”.

b) Pas pikës 2, shtohet pika 3, me këtë përmbajtje:
“3. Moszbatimi i pikës 1 të nenit 34 të këtij ligji nga ana e organit të administratës qendrore e vendore apo i institucionit publik, përbën kundërvajtje administrative dhe dënohet me gjobë në vlerën 50 000 lekë.”.

Neni 33

Në nenin 74, pas pikës 1, shtohet pika 2, me këtë përmbajtje:

“2. Parashikimet e neneve 15, 16 dhe 17, të këtij ligji, zbatohen edhe për pikën 1 të këtij neni, për llogaritjen e xhiros totale.”

Neni 34

Neni 77, në fund të pikës 1 dhe pjesë e saj shtohet paragrafi me këtë përmbajtje:

“Lehtësimi i plotë nga gjoba nuk do t'u jepet ndërmarrjeve që kanë ndërmarrë veprime për të detyruar ndërmarrjet e tjera për t'u bashkuar në një marrëveshje të ndaluar ose për të qëndruar në të.”

Neni 35

Në nenin 78 bëhen ndryshimet e mëposhtme:

a) Pika 1 riformulohet, si më poshtë vijon:

“1. Pavarësisht gjobës së vendosur në bazë të neneve 73 dhe 74 të këtij ligji, Komisioni mund të vendosë gjoba në masën deri në 5 milionë lekë mbi individët, që kryejnë ose bashkëpunojnë në kryerjen e veprimeve që përbëjnë kundërvajtje administrative sipas neneve 73 pika 1 dhe 74 pika 1 të këtij ligji.”

b) Pika 2 shfuqizohet.

Neni 36

Pas nenit 78, shtohet neni 78/1, me këtë përmbajtje:

“Neni 78/1

Afatet e parashkrimit për vendosjen e gjobave

1. Kompetencat e Komisionit për vendosjen e gjobave në zbatim të neneve 73 dhe 74 i'u nënshtrohen periudhave të parashkrimit si në vijim:

a) 3 vjet në rastin e shkeljeve të dispozitave në lidhje me kërkesat për informacion ose me zhvillimin e inspektimeve;

b) 5 vjet në rastin e të gjitha shkeljeve të tjera.

2. Afati i parashkrimit llogaritet që nga dita në të cilën është kryer shkelja. Në rastin e shkeljeve të vazhdueshme ose të përsëritura, parashkrimi duhet të fillojë të llogaritet nga dita në të cilën shkelja ndërpritet.

3. Çdo veprim i ndërmarrë nga Autoriteti i Konkurrencës për qëllim të hetimit ose të procedurave në lidhje me një shkelje, do të ndërpresë periudhën e parashkrimit për vendosjen e gjobave ose gjobave periodike. Periudha e parashkrimit duhet të ndërpritet nga data në të cilën veprimi i Autoritetit i është njoftuar të paktën një ndërmarrje ose grupimi ndërmarrjesh që ka marrë pjesë në shkelje. Veprimet që ndërpresin ecurinë e periudhës përfshijnë veçanërisht sa vijon, por jo vetëm:

a) kërkesat me shkrim për informacion nga Autoriteti i Konkurrencës;

b) autorizimet me shkrim për të kryer inspektime, të lëshuara për nëpunësit e tij nga Komisioni i Konkurrencës;

c) fillimi i procedurave nga Autoriteti i Konkurrencës;

d) njoftimi i raportit hetimor nga Autoriteti i Konkurrencës.

4. Ndërprerja e afatit të parashkrimit duhet të zbatohet për të gjitha ndërmarrjet ose grupimet e ndërmarrjeve që kanë marrë pjesë në shkelje.

5. Çdo ndërprerje do të rinovojë afatin e parashkrimit përsëri. Pavarësisht parashikimeve të pikës 3 të këtij neni, afati i parashkrimit përfundon në ditën në të cilën ka kaluar një periudhë e barabartë me dyfishin e afatit të parashkrimit, pa u vendosur një gjobë ose një gjobë periodike nga Komisioni.”.

Neni 37

Pas nenit 78/1, shtohet neni 78/2, me këtë përmbajtje:

“Neni 78/2

Afati i parashkrimit për ekzekutimin e gjobave

1. Kompetenca e Autoritetit të Konkurrencës për të ekzekutuar një gjobë të vendosur në përputhje me nenet 73 dhe 74 të këtij ligji do t'i nënshtrohet një afati parashkrimi prej 5 vjetësh.
2. Parashkrimi nis të llogaritet nga dita në të cilën vendimi merr formë të prerë.
3. Afati i parashkrimit për ekzekutimin e sanksioneve do të ndërpritet:
 - a) me njoftimin e një vendimi që ndryshon shumën fillestare të gjobës ose pagesës periodike të gjobës ose refuzon një kërkesë për ndryshim;
 - b) me çdo veprim të Komisionit, i përcaktuar për të zbatuar pagesën e gjobës ose pagesën periodike të gjobës.
4. Çdo ndërprerje do të rinovojë afatin e parashkrimit përsëri.
5. Afati i parashkrimit për zbatimin e gjobave pezullohet për aq kohë sa:
 - a) lejohet afati për t'u paguar;
 - b) ekzekutimi i pagesës është pezulluar në bazë të një vendimi gjyqësor.”.

Neni 38

Në nenin 79, në pikën 1, fjalët “ankim në gjykatë brenda 30 ditëve nga data e marrjes së njoftimit për vendimin”, zëvendësohen me fjalët “ankim në Gjykatën Administrative të Shkallës së Parë Tiranë brenda 45 ditëve nga dita e nesërme e marrjes së njoftimit për vendimin.”.

Neni 39

Nenet 81, 82, 83, 84 shfuqizohen.

Neni 40

Ky ligj hyn në fuqi 15 ditë pas botimit në Fletoren Zyrtare.

KRYETARE E KUVENDIT

LINDITA NIKOLLA